

# INUIT ATAQATIGIIT

INATSISARTUNI



UKA 2015/36

25. november 2015

Hans Aronen

**Nunatta pissarititai atorlugit sanaartornermut atortussiornermi tunisassiornissamik  
aallarnisaaniartut qanoq iliirluta tapersorsorsinnaanissaat pillugu apeqquteqaat  
aallaavigalugu Inatsisartut oqallinnissaannik siunnersuut.**

(Inatsisartunut ilaasortaq Ineqi Kielsen, Siumut)

Siullermik apeqquteqaat aallaavigalugu oqallinnissamik qaqitsisumut Ineqi Kielsenimut qujanaq.

Nunatta namminilivinnissaanut ikaarsaariartornitsinni amerlasuutigut inuussutissarsiornermi aningaaarsiornermilu patajaallisaataasinaasunik eqqanaarsareersimanissaq piviusorsiorluinnartuuvoq.

Qulequttap oqallisigineqartussap naalakkersuisunullu kaammattuinissap qaquinneqarneri piffissamik eqquilluarnerusut Inuit Ataqatigiiniik taarusuppagut.

Maani inersuarmi arlaleriarluta isumaqatigiissutigisarparput ullumikkornit annertunerungaartumik Imminut pilersornerusariaqartugut, suliarlu ingerlaavartoq Immitsinnut pilersorneq ullumikkut tamaviaarullugu ingerlanneqarnissaa maanngaanniik naalakkersuisunut kaammattutigisariaqarparput.

Apeqqutit ataasiakkaat siunnersummi tunngavilersuutigineqartutut oqallisiginngikkaluarlugit, inuussutissarsiutilli immitsinnut pilersornerunissamik aammalu avammut niuvernitsinni pilersitsinissanut pisariaqartitatsinnik amigaateqarfingisatta ataatsimut oqallisigineqarnissaat pingaartipparput.

Immami nunamilu inuussutissarsiutit, siunnersuuteqartup suliffeqarfimmut ataatsimut eqqartungaatut assigiinngitsorpassuarnik peqquteqartunik ineriarternissaminnut annertuumik periarfissaqaangillat. Naalakkersuinikkullu sulianik pitsaasunik aallartittoqartaruartoq, nutaamik naalakkersuinikkut aallartittoqaraangat uniinnartinneqaannartartut takussaavallaqaat.

Inuit Ataqatigiiniillu soqutiginartipparput siunnersuuteqartup oqallisissiaata inaarutaasumik taassisutiginissaanut, inuussutissarsiutinik pitsaalluinnartunik nunatsinni aallarnissaanermi ajornartorsiutaasartut ataatsimut isigalugit Naalakkersuisut suliaqarnissaannik kaammattorneqassasugut.